

Amaqut illersugaanerat piniagaanerallu pillugit Namminersorlutik Oqartussat nalu-naarutaat nr. 33, 11. september 2020-meersaq

Piniarneq aallaaniarnerlu pillugit Inatsisartut inatsisaanni nr. 12, 29. oktober 1999-imeersumi § 2, imm. 4, § 8, § 9, § 11, § 12, § 13, imm. 2 aamma 3, § 17, imm. 2, § 18 kiisalu § 21 kingullermik Inatsisartut inatsisaat nr. 1, 16. maj 2008-meersukkut allangortinneqartoq aamma pinngortitamik illersuineq pillugu Inatsisartut inatsisaanni nr. 29, 18. december 2003-meersumi § 5, § 6, § 35, § 36 kiisalu § 60, imm. 2 naapertorlugit aamma Piniarneq pillugu Siunnersuisoqatigiit tusarniarneqareernerata kingorna aalajangersarneqarput:

Atuuffik aamma nassuiaatit

§ 1. Nalunaarut manna Kalaallit Nunaanni issittumi amaqut (Canis Lupus Arctos) illersugaanerannut piniagaanerannullu atuuppoq.

Imm. 2. Nalunaarummi matumani issittumi amaqut matuma kingorna amaqunik taagorneqassapput.

Imm. 3. Aqutsiveqarfiit siornatigut kommuniusimasutut paasineqassapput, Ilanngussaq 1 aamma 2 takukkit.

Imm. 4. Pisassiissutit amerlanerpaaffissaat amaqut pisarineqaqqusaasut amerlanerpaaffissaattut paasineqassaaq.

Eqqissisimatitsineq, piniarneq, pisineq aamma tunisineq

§ 2. Amaqut Kalaallit Nunaanni eqqissisimatitaapput, taamaattoq imm. 2 takujuk.

Imm. 2. Amaqut aqutsiveqarfinni Qaanaami aamma Ittoqqortoormiini atuuttumik inuussutissarsiutigalugu piniarnermut allagartalinneq ukioq naallugu piniarneqaqqusaapput, taamaattoq § 4 takujuk.

§ 3. Amaqqup unioqqutitsinikkut pisarineqarsimasup neqaanik aamma kigutaanik ilaanilluunniit allat tuniniarnissaat, pisiarinissaat imaluunniit tigunissaat inerteqqutaavoq.

Amarorniarnissamut pisassiissutit amerlanerpaaffissaannik aalajangiineq

§ 4. Naalackersuisut amarorniarnissamut pisassiissutit amerlanerpaaffissaannik ukiumi ataatsimi imaluunniit ukiuni arlalinni atuuttunik aalajangiisinaapput.

Imm. 2. Pisassiissutit amerlanerpaaffissaannik aalajangiinermi makku eqqarsaatigineqassapput:

- 1) Piniakkat neqimik pilersuinissamut pingaaruteqartut illersorneqarnissaat amaqqunullu akornusersorneqarnerisa minnerpaaffinngortinnissaat.
- 2) Piniartut atuisullu ilisimasaat.
- 3) Pinngortitaleriffimmiit uumassusililerinermik siunnersuineq.
- 4) Nunat assigiinngitsut akornanni amaqquut piujuaannarnissaat piaqqioqqinnissaallu pillugit isumaqatigiissutit.
- 5) Inuit aamma pigisat illersorneqarnissaat.

Imm. 3. Pisassiissutit amerlanerpaaffissaannik aalajangiineq pillugu Piniarneq pillugu Siunnersuisoqatigiit, kommunit sunnerneqartut aamma kattuffiit attuumassuteqartut tusarniarneqassapput, imm. 1 aamma 2 takukkit.

Imm. 4. Pisassiissutit amerlanerpaaffissaat aalajangerneqartut tusagassiorfinnut nalunaaruteqarnikkut aamma Namminersorlutik Oqartussat nittartagaani nalunaarutigineqartassapput.

Piniariaatsit

§ 5. Amaqqunik piniarnermi taamaallaat qoorortuut atorneqaqqusaapput, sulloqqortussutsillu akuerisat minnerpaaffiat .222-iuvoq.

Imm. 2. Qoorortuut eqiinnartakkat eqittaannartakkallu atornissaat inerteqqutaavoq.

Imm. 3. Qoorortoq sunaluunniit imm. 1 malillugu amaqqunik piniarnermut atoqqusaasoq nakersarneqarsimassaaq paarillugaassallunilu.

§ 6. Toqunartut, nammineq seqqortussiat, kiisartut, nigarsiniutit amaqqunulluunniit uninngatitsinissamut atortut tekniskiusut allat atornissaat inerteqqutaavoq.

Assartuutitik motoorilinnik atuineq

§ 7. Timmisartut, qulimiguullit imaluunniit qamutit motoorillit, soorlu qamuteralaat aamma ATV-t, amaqqunik piniarnermut malersuinernullu atornissaat inerteqqutaavoq.

Amaqquunik pissatamik toqutsineq

§ 8. Amaroq pissanneqarpat piniartup pisussaaffigaa piaarnerpaamik taassuminnga toqutsinissani.

Imm. 2. Amaroq pissanneqartoq toqunneqanngippat piniartup piniarnerup naammassineqarnerata kinguinnguatiqut Aalisarnermut, Piniarnermut Nunalerinermullu Naalackersuisoqarfimmut imaluunniit KANUAANA-mi sumiiffimmi piniarnermut nakkutilliisumut tamanna nalunaarutigissavaa.

Imm. 3. Amaqqumik pissanneqartumik takunnittoqarpat sapinngisamik toqunneqassaaq kingornalu Aalisarnermut, Piniarnermut Nunalerinermullu Naalackersuisoqarfimmut imaluunniit KANUAANA-mi sumiiffimmi piniarnermik nakkutilliisumut nalunaarutigineqassaaq.

Amaqqumik toqungasumik takunninneq

§ 9. Amaqqumik toqungasumik takunnittoqarpat nikisinnagu qimanneqassaaq kingornalu Aalisarnermut, Piniarnermut Nunalerinermullu Naalackersuisoqarfimmut imaluunniit KANUAANAMI-mi sumiiffimmi piniarnermik nakkutilliisumut nalunaarutigineqassaaq.

Kommunimi ileqqoreqqusat

§ 10. Kommunalbestyrelsi kommunimi ileqqoreqqusaliornikkut malittarisassanik aalajangiisinnaavoq kiisalu kommunip iluani nunaminertani aalajangersimasuni amarorniarnermut najoqqutassaliorsinnaalluni, § 2, imm. 2, takuuk.

Imm. 2. Kommunimi ileqqoreqqusaq, imm. 1 takuuk, Aalisarnermut, Piniarnermut Nunalerinermullu Naalackersuisumit atuutilersinneqassaaq.

Pisanik nalunaaruteqartarneq

§ 11. Amaqqut pisanineqartut pissatarineqartullu tamarmik pisaqarnermik nalunaarut immersugassaaq atorlugu nalunaarutigineqassapput, ilanngussaaq 3 takujuk, taannalu pisaqarnerup kingusinnerpaamik ullut 14-it qaangiunneranni kommuni aqqutigalugu Aalisarnermut, Piniarnermut Nunalerinermullu Naalackersuisoqarfimmut nassiunneqassallutik.

Imm. 2. Amaqqut pisanineqartut pissatarineqartullu tamarmik aammattaaq PINIARNEQ-mi ukiumoortumik immersugassaaq atorlugu imaluunniit www.sullissivik.gl -mi ukiumoortumik nalunaarutigineqassapput.

Imm. 3. Pisaq normutalimmik nalunaaqutsiussaqaarsimappat imaluunniit radiukkut aallakaatitsissuteqaarsimappat kommuni aqqutigalugu pisaqarnermik immersukkamut ilanngullugu Aalisarnermut, Piniarnermut Nunalerinermullu Naalackersuisoqarfimmut nassiunneqassaaq.

§ 12. Kalaallit Nunaanni pinerluttulerinermi inatsimmi maleruagassat malillugit amaroq allatut ajornartumik iliortariaqarnermi imaluunniit imminut illersortariaqarnermi toqunneqarpat amarortaq tamarmi Namminersorlutik Oqartussanut pigisassanngortinneqassaaq.

Imm. 2. Amaqqumik toqutsisup toqutsinerup kingusinnerpaamik ullut marluk qaangiunneranni Aalisarnermut, Piniarnermut Nunalerinermullu Naalackersuisoqarfimmut tamanna nalunaarutigissavaa. Naalackersuisoqarfik pisoq pillugu allaganngorlugu nassuiaasiussaaq pisaqarfik, piffissaq aamma toqutsinermi pissutsit sukumiinerusut ilanngullugit.

Imm. 3. Aalisarnermut, Piniarnermut Nunalerinermullu Naalackersuisoqarfik amaqut inoqarfinnut qaninngoortut imaluunniit inoqarfinnukartut pillugit allaganngorlugit maleruagassanik atuutilersitsissaaq.

Nalunaaqutsiineq, eqqussineq, annissineq aamma uumasuuteqarneq

§ 13. Amaqqunik nikkinnaveersitsineq nalunaaqutsiinerlu Aalisarnermut, Piniarnermut Nunalerinermullu Naalackersuisoqarfiup akuersissuteqarneratigut aatsaat pisinnaavoq.

Imm. 2. Amaqqut, tassunga ilanngullugit amaqut piarai, uumasuutigineqaqquusaanngillat.

§ 14. Amaqqut uumasut imaluunniit toqungasut taakkualuunniit ilaat eqquteqqusaanngillat anniseqqusaanatillu, CITES Allattuiffik I takujuk – Convention on International Trade in Endangered Species.

Immikkut akuersissuteqarneq aamma uumassuililerinikkut misissuinerit

§ 15. Aalisarnermut, Piniarnermut Nunalerinermullu Naalackersuisoqarfiup ilisimatusarnermut imaluunniit Kalaallit Nunaata piniagassatigut pisuussutaasa nalunaarsorneqarnerannut atatillugu nalunaarummi malittarisassaniit immikkut akuersissuteqarsinnaavoq.

§ 16. Aalisarnermut, Piniarnermut Nunalerinermullu Naalackersuisoqarfik amarorniarsinnaanermut atatillugu uumassuililerinikkut misissuinerit atugassanik amaqqup ilaanik tunniussisarnissamut piumasqaatinik aalajangersaasinnaavoq.

§ 17. Nalunaarummi matumani § 2-mik, imm. 1, § 3-mik, § 4-mik, imm. 1, § 5-imik, § 6-imik, § 7-imik, § 8-mik, § 10-mik, imm. 1, 2 aamma 3, § 12-imik, imm. 1 aamma 2, § 13-imik kiisalu § 14-imik unioqqutitsinerit Kalaallit Nunaanni pinerluttulerinermi inatsimmi maleruagassat malillugit akiliisitsisummik kiisalu piniutinik inatsisinik unioqqutitsisumik atorneqarsimasunik pisanillu arsaarinninnermik kinguneqarsinnaapput.

Imm. 2. Imm. 1 malillugu suliat Nunatsinni Eqqartuussivimmi suliaannagortinneqassapput.

Imm. 3. Akiliisitsinerit imm. 1 malillugu aalajangersarneqartut Nunatta Karsianut nakkartinneqassapput.

Atuutilersitsineq

§ 18. Nalunaarut manna 12. september 2020-mi atuutilerpoq.

Imm. 2. Peqatigalugu Amaqqut Kalaallit Nunaanni eqqissisimatinneqarnissaat pillugu Namminersornerullutik Oqartussat nalunaarutaat nr. 9, 5. maj 1988-imeersoq atorunnaarsinneqarpoq.

Namminersorlutik Oqartussat, ulloq 11. september 2020

Jens Immanuelson

/

Jørgen Isak Olsen